


Deporte Local

Valuarte di deporte y ex-director di IDEFRE Jerry Gomes a bai sosega



ORANJESTAD (AAN)---Diadomingo marduga a drenta e informacion cu Sr. Jerry Gomes a fayece despues di tabata luchando pa su salud durante ultimo lunanan. Sr. Jerry Gomes tabata e di tres director cu IDEFRE a conoce y despues cu el a baha cu pension, Jerry a sigui aporta grandemente cu consehonan y conosemento den varios organisacion di deporte te cu recientemente. Jerry a sigui bishita oficianan di IDEFRE cu frecuencia debi na su diferente ocupacionnan den deporte y tambe pa mantene e contacto cu director y ex-coleganan.

Jerry Gomes a cuminsa traha na IDEFRE na anja 1982 despues di a fungi como maestro di scol y tambe como cabezante di scol. Na 1976 el a obtene su grado di L.O. den Educacion Fisico y a bay traha na Filomena College Mavo. Su entrada na IDEFRE tabata specialmente dirigi riba e organisacion di deporte escolar e tempo ey. Despues cu ex-director Sr. Roy van Putten q.e.p.d. a baha cu pension na 1985, Jerry Gomes a wordo nombra director di IDEFRE entrante 1986.

Na IDEFRE Jerry hunto cu Roy van Putten q.e.p.d. y tambe Sr. Rudy Leysner, a

stimula y promove e deportenan di careda di distancia largo y ciclismo. Despues e mesun personanan aki hunto cu Sr. Jessy Beukenboom actual director di IDEFRE a introduci e deporte di triathlon na Aruba na 1984. Como director y persona, Jerry semper tabata habri pa duna oportunidad na su trahadornan basta tabata tin e justificacion pa hasi tal, pero tambe tabata exhi produccion y resultado pa por mantene un nivel di prestacion di e servicio. Jerry mescos cu su antecesor tabata un mentor pa su trahadornan y un consehero pa cualquier persona cu tabata desea esaki riba tereno di deporte. Lamentablemente su salud no a permitie sigui aporta na mas pero esunnan cu conoce Sr. Jerry Gomes sa cuanto el a aporta den mundo di deporte Arubano.

Siguientemente un resumen di trayectoria y funcionnan ocupa pa Sr. Jerry Gomes.

" A studia pa bira maestro di scol na Hulanda y a gradua na 1976 na Nijmegen pa su hoofdakte y e mesun aña a cuminsa traha cu SKOA

" A traha como maestro di skol na Michael School y despues na Filomena College como

hoofd.

" Presidente Centro di Barrio Brazil y miembro di Parochie Raad di Brazil

" Deportenan mas practica tabata: volleyball, softball y tennis di mesa

" Den atletismo a gana medaya den categoria sprint (80m y 100m)

" Entrenador di club di atletismo "Striders" hunto cu Winston "Stanky" Ashby

" Den tennis di mesa a titula campeon di Aruba den categoria hubenil na 1961 y a representa Aruba den Campeonato Centro Americano y del Caribe na Colombia hunto cu e.o. Mario Croes Jr., Cholan Jacobs, Herbert Maxwell y Emiliano Jansen.

" Na 1981 a haya reconocimiento di Aruba Jaycees como "Most Outstanding Person" den comunidad.

" Director di IDEFRE 1986-2001

" Miembro di directiva di Fundacion Lotto pa Deporte 1989-1996

" Miembro di Stuurgroep pa Aruba den Koninkrijksspelen voor de Jeugd for di 1995 te awor

" Miembro di Stichting Koninkrijksspelen Aruba (SKA) 1995 te awor

" Tabata co-fundador di Aruba Triathlon Association

" Tabata co-fundador di Aruba Road Runners Club

" Miembro di directi-



va y of presidente di: Aruba Table Tennis Association, Arubaanse Atletiekbond, Brazil Table Tennis Club (9 team), Aruba Road Runners Club, Aruba Triathlon Association y Schoolsport Commissie

" Pa un periodo cortico Jerry tabata miembro di directiva di Comite Olimpico Arubano

" A fungi como miembro di directiva di e siguiente organisacionnan: Aruba Sport Unie, Stichting Koninkrijksspelen Aruba, Aruba Boxing Commission, Oranje Vereniging Aruba, St u u r g r o e p Koninkrijksspelen, Atletiek Vereniging Striders y Antiliaanse Atletiek Unie.

" Secretario di Sportsubsidie Commissie for di 1999 te cu 2011

" Miembro di Nationale Sportraad (

Conseho Nacional di Deporte)

Trahadornan di IDEFRE ex-coleganan ta uni nan mes na yuinan y famia di Sr. Jerry Gomes cu e perdida grandi aki. Jerry semper tabata un luchador y trahador incansabel pa deporte. Paz na su restonan y condolencia na famianan den e momentonan dificil aki.

